



Sesida dals

21 d'october 2024

Communitgà ils

22 d'october 2024

Protocol nr.

828/2024

Incumbensa Derungs

concernent la meglieraziun da las cundiziuns generalas per deponias e per
l'explotaziun da material

Resposta da la Regenza

Tenor il dretg federal d'ambient vegn in'explotaziun da material ordaifer las auas admissa independentamain da la quantitat, sch'il lieu ademplescha las premissas da la planisaziun directiva e da la planisaziun d'utilisaziun. En las proceduras da planisaziun vegni tranter auter garantì, ch'ils lieus d'explotaziun na sa chattian betg en territoris ch'èn periclitads da crudadas da crappa, da bovas u spezialmain d'erosiun ubain en ina zona da protecziun da l'aua sutterrana, da la natira u da la cuntra-da. Conform a l'art. 44 al. 2 lit. c da la Lescha federala davart la protecziun da las auas (Lescha davart la protecziun da las auas, LPAuas; CS 814.20) na dastga ina permissiun d'explotaziun en auas currentas ultra da quai betg vegnir concedida, sche la bilantscha da glera vegn influenzada en moda negativa. Tenor l'art. 43 al. 1 lit. a da l'Ordinaziun davart la protecziun da las auas (OPAuas; CS 814.201) è quai il cas, sch'i vegn prelevà dapli glera d'ina aua currenta che quai ch'i vegn appurtà en moda natirala e sch'i vegn chaschunà in sbassament dal letg da l'aua currenta. Er ils lieus da deponia ston ademplir las premissas planisatoricas. Plinavant prevesa l'Ordinaziun davart la prevenziun e l'allontanament da rument (Ordinaziun da ruments, OPAR; CS 814.600) dapi l'onn 2016 ina grondezza minimala da 50 000 m³ per deponias da material da stgavament (tip A). Questa grondezza minimala dastga vegnir sutpassada mo en cas excepziunals e cun il consentiment da l'Uffizi federal d'ambient (UFAM). En il giudicament da la Regenza ston vegnir discutadas mo las prescripziuns areguard la grondezza minimala; il senn da las ulteriuras prescripziuns dal dretg federal duess senz'auter esser chapaivel ed incontestà. Per che la purschida da spazi da deposit per l'activitad da construcziun normala en las regions na vegnia betg duvrada per projects da via e da viafier, vegnan – per tals projects d'infrastructuras dal dretg spezial – savens er permessas deponias specificas che sutpassan la grondezza minimala, quai cun il consentiment dal UFAM. Reemplenidas

da lieus d'explotaziun u talas per meglierar cultivaziuns en l'agricultura vegnan plinavant permessas fitg generusamain. La pratica federala da permetter projects da deponias ordinaris sut la grondezza minimala è percunter restrictiva. Quai è er chapaivel. Cunter las distanzas da transport pli lungas e cunter las emissiuns da CO₂ pli grondas poi numnadamain er vegnir argumentà, che deponias pli pitschnas n'èn betg rentablas pervia da las mesiras (p.ex. saivs e surveglianza) ch'èn necessarias per impedir deposits nuncontrollads. En lieus da deponias exista plinavant er adina il privel, ch'i vegn deponì material che cuntegna substanzas nuschaivlas geogenas u reglamentadas da nov, sco p.ex. cumposiziuns alchilicas perfluoradas e polifluoradas (PFAS). Ellas cuntegnan er ina ristga potenziala per mesiras posteriuras cun custs consecutivs correspundents. Deponias regionalas centralisadas correspundan er a l'obligaziun da concentraziun tenor ils art. 1 e 2 da la Lescha federala davart la planisaziun dal territori (Lescha davart la planisaziun dal territori, LPT; CS 700). In privel da monopol cuntegnan ellas mo, sch'il manaschi da deponia vegn surlaschè ad ina interpresa. Sch'il maun public è responsabel per las cundiziuns da consegnar material sin las deponias regionalas, pon vegnir impedids pretschs da consegna exagerads che resultan en cas da monopols.

Tar il punct 1: La libertad d'agir vegn gia oz tratga a niz dal tutfatg.

Tar il punct 2: Cun decretar disposiziuns giuridicas chantunalas na pon ins betg sutminar las disposiziuns dal dretg federal.

Tar il punct 3: La Regenza è pronta da tractar – a chaschun da las discussiuns annualas cun la direcziun dal UFAM – la pratica da permetter sutpassaments da la grondezza minimala da las deponias dal tip A, quai cun la finamira d'identifitgar in eventual potenzial d'optimaziun per situaziuns spezialas.

Sin basa da questas explicaziuns propona la Regenza al Cussegl grond d'acceptar e da stritgar sco liquidada l'incumbensa qua avant maun concernent il punct 1, da la refusar concernent il punct 2 e da la midar sco suonda concernent il punct 3: La Regenza vegn incumbensada da tractar – a chaschun da la proxima discussiun annuala cun la direcziun dal UFAM – la pratica da permetter sutpassaments da la grondezza minimala da las deponias dal tip A, quai cun la finamira d'identifitgar in eventual potenzial d'optimaziun per situaziuns spezialas.



En num da la Regenza

Il president:

Dr. Jon Domenic Parolini

Il cancellier:

Daniel Spadin